



Aningaasaqarnermut Aatsitassanullu Naalakkersuisoq

Ulloq: 26. marts 2020
J.nr.: 01.31.06/20-00872

Aningaasaqarnermut Akileraartarnermullu Ataatsimiititaliap pingasunnornermi ulloq 25. marts 2020-mi aalajangiineranik Naalakkersuisunut ilisimatitsineq.

Coronavirusimut (COVID-19) atatillugu peqqinnissaqarnermi immikkut ittumik iliuuseqarnissamut ilassutissatut aningaasaliinissamut qinnuteqaat. – Suliaq nr. 01.31.06/20 – 00872. **Nukinginnarteq**

Naalakkersuisut inassutigaa:

- 2020-mut ilassutitut aningaasaliissutissanut inatsisissatut siunnersuummi konto pingaarneq nutaaq 34.01.05 Coronavirus (COVID-19) tunngavigalugu immikkut ittunik iliuusissat tunngavigalugu immikkut ittumik iliuuseqarnissat ilanngunneqasasooq 0 kr.-imik aningaasaliissutitalerlugu kontomut pingaarnermut missingersuutitut ilanngussaq ilanngunneqartoq naapertorlugu, aamma
- ilanngussaq ilanngunneqartoq naapertorlugu 2020-mut ilassutitut aningaasaliissutissanut inatsimmut siunnersuummi kontumut pingaarnermut, 34.01.05 Coronavirus (COVID-19) tunngavigalugu immikkut ittunik iliuusissat, oqaasertaliussat nr. 1, 2 aamma 3 ilanngunneqassasut”

Aningaasaqarnermut Akileraartarnermullu Ataatsimiititaliap oqaaseqaatai apeqqutaalu:

Suliami aalajangiinerminut matuma kinguliani allassimasumut tunngatillugu apeqqutit oqaaseqaatillu matuma kingulianiittut piaartumik akineqarnissaat ataatsimiititaliamit kissaatigineqarpoq.

Apeqqut 1:

Inassuteqaat Aningaasaqarnermut Akileraartarnermullu Ataatsimiititaliamit ima paasineqarpoq; immikkut ittumik aningaasaliissutissat qanoq amerlatiginissaat Naalakkersuisunit sulii paasineqarsimanngitsoq. Taama oqariartorneq ataatsimiititaliamit tusaatissatut tiguneqarpoq. Tamatuma kingorna aningaasaliissutissat pisariaqartinneqartut paasinarsineroriarpata kontomi pingaarnermi siuliani taaneqartumi aningaasaliissutissat immikkoortinneqarnerannik imaqartumik aningaasaliissuteqarnissamik qinnuteqaammik Naalakkersuisut nassiussinissaat ataatsimiititaliamit naatsorsuutigineqarpoq.

Apeqqut 2:

Aningaasaliissutit 50 mio. kr.-inik aalajangersimasumik aningaasartalerneqarnissaat aalajangersarneqasasooq Peqqissutsimut Pitsaaliuinernullu Aqutsisoqarfiup siunnersuutigigaa ataatsimiititaliamit maluginiarneqarpoq. Aningaasanilli aalajangersimasunik aalajangersaannissap utaaqimaarneqarnissaa Naalakkersuisunut toqqarneqarpoq, tassa coronavirusip nassatarisaanik aningaasartuutissat annertussusissaat piffissap imaalinerani qulaajarumi-naammata. Taama toqqaaneq ataatsimiititaliamit paasilluarneqarsinnaavoq, tamannalu pillu-

gu aningaasaliissuteqarnissamik qinnuteqaammik Naalakkersuisut nassiussinissaat utaqqi-neqarpoq. Tassungali atatillugu aningaasaliissuteqaqqinnissamik pisariaqartitsineq aningaasanit siuliani taaneqartunit 50 mio. kr.-iusunit annertunerussagaluarpat Naalakkersuisut kinguarsaanertaqanngitsumik tamanna pillugu ataatsimiititaliamut ilisimatitsinissaat ataatsimiititaliamit kissaatigineqarpoq.

Kiisalu ataatsimiititaliamit aamma naatsorsuutigineqarpoq 50 mio. kr.-init taaneqartunit amerlanerusunik aningaasartuuteqartoqassappat, tamanna Aningaasaqarnermut Akileraartarnermullu Ataatsimiititaliap siumoortumik akuersissutiginneqqaarneratigut aatsaat pisinnaasoq.

Apeqqu 3:

Aningaasaliissutit nalinginnaasut aammalu aningaasaliissutit immikkut ittut suliami matumani ersarilluinnartumik immikkoortinneqarnissaat ataatsimiititaliamit naatsorsuutigineqarpoq. Taamaalillunilu ataatsimiititaliamit naatsorsuutigineqarpoq nalinginnaasumik aningaasaliissutit aningaasaliinermi tunngavigineqartut malillugit atorineqarnissaat, taamaalillunilu qulakkeerneqarluni assersuutigalugu peqqinnissaqarfimmik nalinginnaasumik ingerlatsinermi aningaasanik tigusisoqannginnissaa. Taamaattumillu aningaasaliissutaareersut coronamut tunngatillugu aningaasartuutitut pingaarnertut atorineqarnissaat, tamatumalu kingorna suliamut matumunnga tunngatillugu aningaasaliissutaasut taakku qaavannut ilineqarnissaat ataatsimiititaliamit naatsorsuutigineqanngilaq.

Apeqqu 4:

Suliamut tunngatillugu isummernissamut tunngavissiami ima allassimavoq:

”Oqartussaaffinnut peqqinnissaqarfiunngitsumut immikkut aningaasartuutit matussusernissaannut tunngatillugu maluginiaqquneqassaaq coronavirusi aningaasaliissutigineqartunut allanut suliakinnerulernermik kinguneqarnissaa, matumani angalanerit, atorfinitsitsinerit il.il. Aammattaaq pilersaarutaasut suliniutaasut suli aallartinneqarsimannngitsut kinguartinneqarsinnaanngillat. Aningaasaqarnermut Naalakkersuisoqarfiup naalakkersuisoqarfiit sinneri suleqatigalugit piffissami aggersumi suliassaqarfiit sorliit suliakinnerulernersut suliaqarnerulersullu pillugit qulaajarniarniarpai.”

Tamatuma itisilernerneqarnissaa ataatsimiititaliamit kissaatigineqarpoq. Coronavirus tunngavigalugu pisariaqartumik immikkut ittumik iliuuseqartariaqarnerup kingunerisaanik qitiusumik allaffeqarfimmi taakkulu ataanni ingerlatsivinni naatsorsuutiginnngisanik aningaasartuuteqartoqartariaqarnissaa Naalakkersuisunit naatsorsuutigineqarpa? Taamaassimappat taamatut aningaasartuutaanerussutaasinnaasut suliasat aningaasaliinermi tunngaviit aalajangersimasut naapertorlugit ingerlanneqaannarsinnaanerannut pitsaanngitsumik kinguneqannginnissaat Naalakkersuisunit qanoq qulakkeerneqalersaarpa? Peqqinnissaqarfimmi suliniuteqarnermut immikkut aningaasaliissuteqarnissaaq isummernissamut tunngavissiami matumani pineqarmat peqqinnissaqarfiup avataani immikkoortunut allanut sunniutigisinnaasai Naalakkersuisunit naliliiffigineqarnissaat ataatsimiititaliamit kissaatigineqarpoq.

Nunatta karsianit toqqaannartumik tigusinikkut aningaasartuuteqarnerunissamut piginnaatissuteqarnerup aammalu atuinerussutinik aningaasat ukiuannut tullermut nuussisinnaanerup saniatigut covid-19 pissutigalugu immikkut ittumik iliuutsit tamaasa matussuserniarlugit suliniutit maanna ingerlasut aallartinneqartussallu sorliit aningaasanik aallerfigineqalersaarpat?

Apeqqu 5:

Ilassutitut aningaasaliissuteqarnissamik qinnuteqaatit siulliit assigalugit suliap ingerlanera pillugu ingerlaavartumik ilisimatinneqartarnissaq Aningaasaqarnermut Akileraartarnermullu Ataatsimiititaliamit kissaatigineqarpoq. Tamanna akuttunngitsumik minnerpaamillu ullut 14.-ikkaarlugit imaluunniit naatsorsuutiginnisamik pisoqarnerani pisariaqarpoq. Aningaasaliissuteqaqqinnissamik pisariaqartitsineq aningaasanit siuliani taaneqartunit 50 mio. kr.-iusunit annertunerussagaluarpat Naalakkersuisut kinguarsaanertaqanngitsumik tamanna pillugu ataatsimiititaliamut ilisimatitsinissaannik ataatsimiititaliap apeqqu 2-mi kissaataa ataatsimiititaliamit uteqqinneqassaaq.

Apeqqu 6:

Ungasinnerusoq isigalugu kingunerisinnaasai pillugit Naalakkersuisut qanoq eqqarsaateqarpat aammalu Naalakkersuisut allanik ilassutissaqarpat?

Coronavirus tunngavigalugu pisariaqartumik immikkut ittumik iliuseqartariaqarnerup pisortanut aningaasaqarnikkut allaffissornikkullu ataatsimoortumik kingunerisaat pillugit erseqqinnerusumik nassuiaammik Naalakkersuisut maannangaaq piareersaalereernissaat ataatsimiititaliamit kissaatigineqarpoq.

Kiisalu iliuitsit assigiinngitsut manna tikillugu aallartinneqartut tunngavigalugit angusat pillugit killiffimmik Naalakkersuisut ataatsimiititaliap nalinginnaasumik ataatsimiinnerani saqqummiussinissaat ataatsimiititaliamit kissaatigineqarpoq. Tassunga aamma atatillugu Naalakkersuisut pilersaarutaat siumut isigisut pillugit ilisimatinneqarnissani ataatsimiititaliap kissaatigaa.

Apeqqu 7:

Suliaq manna pillugu sulinerup ingerlaqqinnerani Ilaqutariinnermut Peqqissutsimullu Ataatsimiititaliap susasaqartutut akuutinneqarnissaa Naalakkersuisunit isumaliutigineqarsimava?

Aningaasaqarnermut Akileraartarnermullu Ataatsimiititaliap aalajangiinera

Siuliani allassimasutut oqaaseqaateqarluni apeqquaqarlunilu Naalakkersuisut inassuteqaataat Aningaasaqarnermut Akileraartarnermullu Ataatsimiititaliamit **akuerineqarput**.

Inussiarnersumik inuulluaqqusillunga



Hermann Berthelsen

Aningaasaqarnermut Akileraartarnermullu Ataatsimiititaliap siulittaasua